

Presidente sindicato ABV

“Sr. Cilie ta cuadra net den profile di e vacatura aki”

ORANJESTAD – Despues di varios siman di spera y hopi expectativa crea, finalmente Hunta di Supervicion di Dr. Horacio Oduber Hospital a informa riba eleccion di e director medico nobo den nomber di sr. Ezzard Cilie.

E ta un persona cu un experiencia grandi den cuida den su profesion riba tereno di enfermeria y ultimo tempo e tabata trahando como beleidsmedewekker den e proyectonan di hospital.

E ta un persona clave den e proceso cu actualmente HOH ta pasando den dje pa loke ta e parti logistico di servicio durante e expansion y

renobacion di e instituto aki.

Sr. Cilie kende tin mas cu 30 aña trahando den e institucion hospitalario aki tabata e candidato mas fuerte entre un total di tres cu tabata aspira e funcion aki.

Sr. Cilie ta gosa di un gran aprecio y credibilidad cerca e trahadonan y naturalmente e tabata e candidato cu sindicato di hospital, ABV tabata boga p’e.

Sindicato ABV

Ayera presidente di ABV sra Gina Maduro a expresa su satisfaccion pa e nombramento aki. Ya cu practicamente hunta di supervicion a honra loke sindicato ABV tabata kier como director

medico di hospital. Encuanto e nombramento aki cu a cay diaranson atardi e ta kere cu “ta na su lugar y duidelijk. Pa mi no tabatijn mester di niun decision, e tabata bon cla cu e ta e persona indica”, asina e sindicalista Maduro a declara na Bon Dia Aruba ayera.

E ta haya cu “sr. Cilie ta cuadra net den profile di e vacatura aki”.

Encuanto cu sr. Ezzard Cilie a ser nombra como un director medico interino pa un periodo di 6 luna so, e sin-



dicalista Gina Maduro a bisa cu esaki a wordo papia claramente. Sinembargo el a laga sa cu sr. Cilie por bay pa seis luna mas si tur cos ta bay bon,

pues e tin chens pa bay te un aña te ora cu e vacatura aki lo ser yena cu un director permanente pa un periodo mas largo. □